


樂府雅詞附拾遺
三





樂 府 雅 詞

附 拾 遺

(三)

曾 慥 編

樂府雅詞卷四

葉少蘊

葉夢得字少蘊號石林吳縣人有一卷石林詞一卷

應天長

松陵秋已老。正柳岸田家酒醅初熟。鱸膾尊羹。萬里水天相續。扁舟
凌浩渺。寄一葉暮濤吞沃。青篛笠西塞山前。自翻新曲。來往未應
足。便細雨斜風。有誰拘束。陶寫中年。何待更須絲竹。鳴夷千古意。算
入手。比來尤速。最好處。是一作千點雲峯。半篙澄綠。

水調歌頭

濠州觀魚臺作

渺渺楚天闊。秋水去無窮。兩涯不辨牛馬。輕浪舞回風。獨倚高臺一
笑。圍圍游鯨來往。還戲此波中。危檻對千里。落日照澄空。子非我。
安知我。意真同。鵬飛鷗化何有。滄海漫冲融。堪笑磻溪遺老。白首直

鈞溪畔。歲晚忽衰翁。功業竟安在。徒自兆非熊。

又

九月望日。與客習射西園。余偶病不能射。客較勝相先。將領岳德弓。強二石五斗。連發三中的。觀者盡驚。因作此詞。

示坐客。前一夕大風。是日始寒。

霜降碧天靜。秋事促西風。寒聲隱地。初聽中夜入梧桐。起瞰高城回望。寥落關河千里。一醉與君同。疊鼓鬧清曉。飛騎引彫弓。歲將晚。客爭笑。問衰翁。平生豪氣安在。沈領一作走馬。爲誰雄。何似當筵虎士。揮手弦聲發處。雙雁落遙空。老矣真堪愧。回首望雲中。

又

送人

江海渺千里。飄蕩歎流年。等閒疋馬相過。乘興卻脩然。十載悲歡如夢。撫掌驚呼相語。往事盡飛煙。此會真難偶。此醉且留連。酒方半。誰輕使。動離絃。我歌未闕。君去。明日復山川。空有高城危檻。縹緲當筵。清唱餘響落尊前。細雨黃昏後。飛雁點遙天。

念奴嬌

南歸渡揚子作
雜用淵明語

故人漸遠。

一作故山漸遠

念淵明歸意。脩然誰論。歸去來。今秋已老。松菊三

徑猶存。稚子歡迎。飄飄風袂。依約舊衡門。琴書蕭散。更欣有酒盈尊。

憫悵萍梗無根。天涯行已徧。空負田園。去矣何之。窗戶小。容膝聊

倚南軒。倦鳥知還。晚雲遙映。山氣欲黃昏。此還一作中真意。故應欲辨

忘言。

又

中秋燕客有
懷吳江長橋

洞庭波冷。望冰輪初轉。滄海沈沈。萬頃孤光。雲陣卷。長笛吹破層陰。
洶湧三江。銀濤無際。遙帶五湖深。酒闌歌罷。至今鼉怒龍吟。回首
江海平生。漂流容易散。佳期難尋。縹緲高城。風露爽。獨倚危檻重臨。
醉倒清尊。常娥應笑。猶有向來心。廣寒宮殿。爲余聊借瓊林。

臨江仙

聞道今年春信早。梅花不怕餘寒。憑君先向近南看。香苞開也未。莫待北枝殘。腸斷隴頭它日恨。江南幾驛征鞍。一盃聊與盡餘歡。風情何所似。老去未應閒。

又

雪後寄周十

夢裏江南渾不記。祇君幽戶難忘。夜來急雪繞東塘。竹窗松徑。無處問歸航。甕底新醅應已熟。一樽知與誰嘗。會須雄筆卷蒼茫。雪濤隱戶。瓊玉照頰牆。

又

與客湖上飲

不見跳魚翻曲港。湖邊特地經過。蕭蕭疎雨亂風荷。微雲吹散。涼月墮平波。白酒一盃還徑醉。歸來散髮婆娑。無人能唱採菱歌。小軒欹枕。簷影掛星河。

又

送友人還姑蘇。重寄程致道。

碧瓦新霜侵曉夢。黃花已過清秋。風帆何處掛扁舟。故人歸欲盡。殘日更回頭。樂圃橋邊煩借問。有人高臥江樓。寄聲聊爲訴離憂。桂叢應已老。何事久淹留。

又

席上次韻
韓文若

聞道安車來過我。百花未敢飄零。疾催絃管送盃行。五朝瞻舊老。揮塵聽風生。鳳詔遠從天上落。高堂燕喜初醒。莫言白髮減風情。此時誰得似。飲罷卻精明。

又

三月鶯花都過了。曉來雪片猶零。嵩陽居士記行行。西湖初水滿。遙想縠紋生。欲爲海棠傳信息。如今底事長醒。不應高臥頓忘情。當時風月在。相見眼終明。

又

次韻洪思
誠席上

澱豔湖光供一笑。未須醉日論千。將軍曾記舊臨邊。野塘新水滿。煙岸藕如船。卻怪情多春又老。回腸易逐愁煎。何如旌騎鬱相連。凱歌歸玉帳。錦帽碧油前。

又

十一月二十四日同王幼安洪思誠過會存之園亭。

學士園林人不到。傳聲欲問江梅。曲欄清淺小池臺。已知春意近。爲我著詩催。急管行觴圍舞袖。故人坐上三台。此歡此宴固難陪。不辭同二老。倒載習池迴。

又

次韻答幼安思誠存之席上梅花。

不與羣芳爭絕豔。化工自許寒梅。一枝臨晚照歌臺。眼明渾未見。絃管莫驚催。記取劉郎歸去路。他年應話天台。酒闌不惜更重陪。夜寒衣袂薄。猶有暗香迴。

又

正月二十四日晚至湖上。

三日疾風吹浩蕩。綠蕪未遍平沙。約回殘影射明霞。水光遙泛坐。煙柳臥欹斜。霜鬢不堪春點檢。留連又過芳華。一枝重插去年花。此身江海夢。河處定吾家。

浣溪沙

重陽前一日
登極目亭

小雨初迴昨夜涼。繞籬新菊已催黃。碧空無際卷蒼茫。千里斷鴻供遠目。十年芳草掛愁腸。緩歌聊與送瑤觴。

又

綠野歌歡喜見分。驟驚和氣曉來勻。妙歌誰敢和陽春。梅蘂舊年迎臘雪。月華今夜破黃昏。獨醒爭笑楚人魂。

水龍吟

二月十日西
湖燕客作

對花常欲留春。恨春故遣花飛早。曉來雨過。綠陰新處。幾番芳草。一片飄時。已知消滅。滿庭誰掃。料多情也似。愁人易感。先催赴。朱顏老。

猶有清明未過。但狂風、忽忽難保。酒醒夢斷。年年此恨。不禁相惱。只恐春應暗留芳信。與花爭好。有姚黃一朶。殷勤付與。送金樽倒。

賀新郎

睡起啼鶯語。掩青苔、房櫳向曉。亂紅無數。吹盡殘花無人見。惟有垂楊自舞。漸暖靄、初回輕暑。寶扇重尋明月影。暗塵侵、尙上一作有乘鸞女。驚舊恨、鎖如許。江南夢斷橫江一作渚。浪粘天、蒲萄漲綠。半空煙雨。無限樓前滄波意。誰採蘋花寄取。但悵望、蘭舟容與。萬里雲帆何時到。送孤鴻、目盡一作千山阻。重一作爲我、唱金縷。

滿庭芳

三月十七日雨後極目亭
同張敏叔程致道全遊

麥隴如雲。清風吹破。夜來疎雨纔晴。滿川煙草。殘照落微明。縹緲危欄曲檻。遙天盡、日脚初平。青林外、參差暝靄。縈帶遠山橫。孤城春已過。綠陰是處。時有鶯聲。問落絮游絲。畢竟何成。信步蒼苔繞遍。眞

堪付閒客閒行。微吟罷。重回皓首。江海渺遺情。

又

二公和示復
韻寄酬

楓落吳江。扁舟搖蕩。暮山斜照初晴。此心長在。秋水共澄明。底事經年易拚。驚遺恨、悄悄難平。臨風處。佳人萬里。霜笛爲誰橫。長城。誰敢犯。知君五字。元有詩聲。笑茅舍何時。歸計眞成。綠鬢朱顏老盡。柴車在。行卽終行。聊相待。狂歌醉舞。雖老未忘情。

滿江紅

重陽賞菊時
余已除代

一朶黃花。先催報。秋歸消息。滿芳枝凝露。爲誰裝飾。便向樽前拚醉倒。古今同是東籬側。問何須。特地賦歸來。拋彭澤。回首去年時節。開口笑。眞難得。使君今郡一作那更。自成行客。霜鬢不辭重插滿。他年此會何人憶。記多情。曾伴小欄干。親攀摘。

又

雪後郊原。煙林靜。梅花初坼。春初半。猶是探春消息。一眼平蕪看不盡。夜來小雨催新碧。笑去年、攜酒折花時。一作人。一作君。一作花。一作應識。蘭舟漾城南陌。雲影淡。天容窄。繞風漪十頃。暝浮晴色。恰似槎頭收釣處。坐中仍有江南客。試與問、何如。諸家詞皆三字。一當衍。兩槳下苕溪。吞雲澤。

點絳脣

晚出刀山榭。春初植蘭。榭側近復生紫芝。二本。○案。刀字疑誤。一本無刀字。

高柳蕭蕭。睡餘已覺西風勁。小窗人靜。浙瀝生秋聽。底事多情欲與流年競。殘雲暝。墜巾慵整。獨立芝蘭徑。

又

紹興乙卯登絕頂小亭。

縹緲危亭。笑談獨在千峯上。與誰同賞。萬里橫煙浪。老去情懷猶作天涯想。空惆悵。少年豪放。莫似衰翁樣。

南歌子

四月二十六日集客臨芳觀。

麥隴深初轉。桃溪曲漸成。綠槐重疊午陰清。更有榴花一朶照人明。
畫棟清微暑。疏簾入晚晴。請君坐待穀紋平。看取紅幢綠蓋引前
旌。

鷓鴣天

同十二月二十二日
許幹譽賞梅

不怕微霜點玉肌。恨無流水照冰姿。與君著意從頭看。初見今年第
一枝。人醉後。雪晴時。江南春色寄來遲。使君本是花前客。莫怪殷
勤爲賦詩。

又

元夕次
幹譽韻

夾路行歌盡落梅。篆煙香細裊寒灰。雲移碧海三山近。月破中天九
陌開。追樂事。惜多才。車聲遙聽走晴雷。十年夢斷鈞天奏。猶記流
霞醉後杯。

虞美人

雨後同幹譽才卿
置酒林檎花下

落花已作風前舞。又送黃昏雨。曉來庭院半殘紅。惟有遊絲千丈裊
晴空。殷勤花下重攜手。更盡杯中酒。美人不用斂歌眉。我亦多情
無奈酒闌時。

又

極目亭
望西山

翻翻翠葉梧桐老。雨後涼生早。葛巾藜杖正關情。莫遣繁蟬容易作
秋聲。遙空不盡青天去。一抹殘霞暮。病餘無力厭躋攀。爲寄曲欄
幽意到西山。

又

席上

一聲鶗鴂催春晚。芳草連空遠。年年遺恨怨殘紅。可是無情容易愛
隨風。茂林脩竹山陰道。千載誰重到。半湖流水夕陽前。猶有一觴
一詠似當年。

又

二月小雨。達旦。西窗獨臥。寒甚不能寐。時窗前梨花將謝。

數聲微雨風驚曉。燭影欹殘照。客愁不耐五更寒。明日梨花開盡有誰看。追尋猶記清明近。爲向花邊問。東風正使解欺儂。不道花應有恨也。匆匆。

卜算子

三月八日夜
鳳亭納涼

新月掛林梢。暗水鳴枯沼。時見疏星落畫簷。幾點流螢小。歸意了無多。故作連環繞。欲寄新聲問採菱。水闊煙波渺。

木蘭花

二月十六日晚
雨集客湖上

花殘却似春留戀。幾日餘寒吹酒面。溼煙不隔柳條青。小雨池塘初有燕。波光縱使明如練。可奈落紅粉似霰。解將心事訴東風。只有流鶯千種轉。

減字木蘭花

前村夜半。每爲江梅腸欲斷。淺紫深紅。誰信漫天雪裏逢。醉頭扶

起。宿酒闌干猶困倚。便莫催殘。明日東風爲掃看。

滿庭芳

次舊韻。答蔡州王道濟見寄。

一曲離歌。煙村人去。馬頭微雪新晴。隔年光景。回首近清明。斷送殘花又老。春波靜、湖水初平。誰重到。雕欄盡日。遙想畫橋橫。高城凝望久。何人爲我。重唱餘聲。問桃李如今。幾處陰成。老去從游似夢。樽前事、空有經行。猶能記。殷勤寄語。多謝故人情。

醉蓬萊

辛丑寓楚州。上巳日有懷許下西湖。作此詞寄會存之。王仲弓。

問春風何事。斷送繁紅。便拚歸去。牢落征塗。笑行人羈旅。一曲陽關。斷雲殘靄。做渭城朝雨。欲寄離愁。綠陰千幘。黃鶯空語。遙想湖邊。浪搖空翠。絃管風高。亂花飛絮。曲水流觴。有山翁行處。翠袖朱闌。故人應也。弄畫船煙浦。會寫相思。樽前爲我。重翻新句。

臨江仙

癸卯次葛魯卿法華山勸酒韻。

山半飛泉鳴玉珮。回波倒捲鮮鱗。醉巾聊濯十年塵。青山應却怪。此段久無人。行樂應須賢太守。風光過眼逡巡。不辭常作坐中賓。只愁花解笑。衰鬢不宜春。

定風波

七月望。趙倅置酒與魯卿同泛酒登駝駝橋待月。

千步長虹跨碧流。兩山浮影轉螭頭。付與詩人都總領。風景更逢仙客下瀛洲。嫋嫋涼風吹汗漫。平岸遙空新卷絳河收。却怪嫦娥真好事。須記探支明月作中秋。

又

魯卿見和復答。

斜漢初看素月流。坐驚金餅出雲頭。華髮蕭然吹素領。光景何妨分付屬滄洲。莫待霜花飄爛漫。蘋岸更憑佳句盡拘收。解與破除消萬事。誰記一樽同得二年秋。

八聲甘州

甲辰承詔堂知止亭初畢工。劉無言相過作。

寄知還倦鳥對飛雲。無心兩難齊。漫飄然欲去。悠然且止。依舊山西。
十畝荒園未徧。趁雨却鋤犁。敢忘隣家約。有酒同攜。 況是崑前新
創。帶小軒橫絕。松柱或蹊。試憑高東望。雲海與天低。送滄波。浮空千
里。照斷霞。明滅卷晴霓。君休笑。此生心事。老更沈迷。

水龍吟

八月十三日。與強少逸遊道場山。放舟中流。命工吹笛。舟尾迎月歸。

拖樓橫笛孤吹。暮雲散盡天如水。人間底事。忽驚飛墮。冰壺千里。玉
樹風清。慢披遙卷。與天無際。料嫦娥此夜。殷勤偏照。知人在。千山裏。
常恨孤光易轉。仗多情。使君料理。一杯起舞。曲終須寄。狂歌重倚。
爲問飄流。幾逢清影。有誰同記。但尊中有酒。長追舊事。拚年年醉。

卜算子

木芙蓉九日。旦盛開作。

小雨洗新妝。豔豔驚衰眼。不趁東風取次開。待得清霜晚。 曲港照
回流。影亂微波淺。作態低昂好自持。水闊煙林遠。

水調歌頭

癸丑中秋作

河漢下平野。香霧捲西風。倚空千嶂橫起。銀闕正當中。常恨年年此夜。醉倒歌呼誰和。何事偶君同。莫恨歲將晚。容易感梧桐。覽清影。君試爲。問天公。遙知玉斧初斲。重到廣寒宮。付與孤光千里。不遣微雲點綴。爲我洗長空。老去狂猶在。應未笑衰翁。

又

秋色漸將晚。霜信報黃花。小窗低戶深映。微路遶欹斜。爲問山翁何事。坐看流年輕度。拚却鬢雙華。徙倚望滄海。天靜水明霞。念平昔。空飄蕩。徧天涯。歸來三徑重掃。松竹本吾家。却恨悲風時起。冉冉雲閒新雁。邊馬怨鳴笳。誰似東山老。談笑靜胡沙。

臨江仙

西園右春亭新成作

手種千株桃李樹。參差半已成陰。主人何事馬駸駸。二年江海路。空

負種花心。試向中間安小檻。此還長要追尋。却驚搖落動悲吟。春歸知早晚。爲我變層林。

又

乙卯八月九日南山絕頂作臺新成與客賞月作

絕頂參差千嶂列。不知空水相浮。下臨湖海見三州。落霞橫晚景。爲客小遲留。卷盡微雲天更闊。此行不負清秋。莫驚河漢近人流。青鬢元有路。一笑倚瓊樓。

又

明日與客復登臺再用前韻

一醉三年那易得。應須大白同浮。已知絕景是吾州。嫦娥仍有意。更肯爲人留。萬籟無聲遙夜永。人間未識清秋。從來我客盡風流。故知憐老子。尤勝在南樓。

又

明日小雨已而風大作復晚晴遂見月與客再登

卷地驚風吹雨去。却看香霧輕浮。遙知青影徧南州。萬峯橫玉立。誰

爲此山留。邂逅一歡須共惜。年年長記今秋。平生江海恨飄流。元龍眞老癩。無意臥高樓。

又

去歲中秋商山臺初成。與徐敦立氏昆仲連三日極飲其上。月色達旦無纖雲。當作臨江仙三首。今歲敦立在館中。招章幾道。朱三復會詔芳亭。追懷去年之集。復用舊韻作。

一醉年年今夜月。酒船聊更同浮。恨無羯鼓打梁州。遺聲猶好在。風景一時留。老去狂歌君勿笑。已拚雙鬢成秋。會須擊節泝中流。一聲雲外笛。驚看水明樓。

右贈坐客。世傳梁州西涼府初進此曲。會明皇游月宮還。記霓裳之音。適相近。因作羽衣曲。以梁州名之。是夕。約諸君明夜泛舟。故云。

又

草草一年眞過夢。此生不恨萍浮。且令從事到青州。已能從辟穀。那

更話封留。好月嘗尋當日約。故人何啻三秋。瑤琴欲寫竹間流。此聲誰解聽。空上仲宣樓。

點絳脣

丙辰八月二十七日晚
雨中與何彥亭小飲

山上飛泉漫流。山下知何處。亂雲無數。留得幽人住。深閉柴門。聽盡空簷雨。秋還莫。小窗低戶。唯有寒蛩語。

菩薩蠻

己未五月十七日
贈無住道人

經年不踏斜橋路。青山試問誰爲主。密葉轉迴風。寒泉落半空。此閒無限興。可使荒三徑。明日下扁舟。滄波莫浪遊。

鷓鴣天

東坡嘗有詩曰。荷盡已無擎雨蓋。菊殘猶有傲霜枝。一年好景君須記。最是橙黃橘綠時。此非吳人無以知其爲佳也。余居有小池。種荷移植十本於池側。每秋晚常喜誦此句。因小增損。以鷓鴣天

歌之。

一曲青山映小池。綠荷陰盡雨離披。何人解識秋堪美。莫爲悲秋浪
賦詩。攜濁酒。遶東籬。菊殘猶有傲霜枝。一年好處君須記。正是橙
黃橘綠時。

趙德麟

案趙令時字德麟·
有聊復集一卷·

天仙子

宿雨洗空臺榭瑩。下盡珠簾寒未定。花開花落幾番晴。春欲竟。愁未醒。池面杏花紅透影。一紙短書言不盡。明月清風還記省。玉樓香斷又添香。閒展興。臨好景。心似亂萍何處整。

浣溪沙

劉平叔出家妓人八人絕藝乞詞贈
之。○平叔出家妓人八人絕藝乞詞贈
脚絕。○歌絕。○琴絕。○舞絕。

穩小弓鞋三寸羅。歌唇清韻一櫻多。燈前秀豔總橫波。指下鳴泉清杳渺。掌中回旋小婆娑。明朝歸路奈情何。

菩薩蠻

輕鷗欲下春塘浴。雙雙飛破春煙綠。兩岸野薔薇。翠籠薰繡衣。凭
舡聞弄水。中有相思意。憶得去年時。水邊初別離。

又

長淮渺渺寒煙白。憑欄人是霜臺客。詩句妙春豪。風雲不啻高。樽
前人已老。餘恨連芳草。一曲酒醒時。梧桐月欲低。

又

春風試手先梅蕊。頽姿冷豔明沙水。不受衆芳知。端須月與期。清
香閑自遠。先向釵頭見。雪後燕瑤池。人閒第一枝。

好事近

急雨漲谿渾。小樹帶山秋色。輕棹暮天歸路。裊芙蓉煙白。酒醒香
冷夢回時。蟲聲正淒絕。只覺小窗風月。與昨宵都別。

小重山

樓上風和玉漏遲。秋千庭院靜。百花飛。午窗才起暖金卮。勻面了。闌
畔看春池。何事苦顰眉。碧雲春信斷。儘來時。鴛鴦游戲鎮相隨。雲
霧斂。新月掛天西。

又

雨霽風高天氣清。玉盤浮出海。轉空明。小窗簾影冷如冰。愁不寐。獨自傍階行。情似浪頭輕。一番銷欲盡。一番生。無言惆悵到參橫。人欲起。鶉鴉幾聲鳴。

蝶戀花

欲減羅衣寒未去。不捲珠簾。人在深深處。紅杏枝頭花幾許。啼痕止恨清明雨。盡日沈煙香一縷。宿雨醒遲。惱破春情緒。飛燕又將歸信誤。小屏風上西江路。

又

卷絮風頭寒欲盡。墜粉飄香。日日紅成陣。新酒又添殘酒困。今春不減前春恨。蝶去鶯飛無處問。隔水高樓。望斷雙魚信。惱亂橫波秋一寸。斜陽只與黃昏近。

西江月

人世一場大夢。我生魔了十年。明窗千古探遺編。不救饑寒一點。
更被維摩老子。不教此處容言。爐薰清炷坐安禪。物物頭頭顯現。

滿庭芳

玉枕生涼。金缸傳曉。敗葉飛破清秋。雨餘翻浪。渺渺阻行舟。暫繫汀洲側畔。風夜起。荻葉添愁。銀屏遠。龍香漸盡。還似夢揚州。更籌。何太永。當年情事。今日堪酬。最苦恨紅樓。笑我飄浮。爲寄相思細字。教字字。愁蹙眉頭。淒涼久。漁人唱曉。隨月過橫溝。

清平樂

春風依舊。著意隨堤柳。搓得蛾兒黃欲就。天氣清明時候。去年紫陌青門。今宵雨魄雲魂。斷送一生憔悴。只銷幾個黃昏。

思遠人

素玉朝來有好懷。一枝梅粉照人開。情雲欲向盃中起。春色先從臉上來。深院落。小樓臺。玉盤香篆看徘徊。須知月色撩人恨。數夜春寒不下階。

臨江仙

阿方初出

枝上粉香吹欲盡。依前庭院春風。更誰同繞摘芳叢。漏殘金獸冷。信斷錦屏空。看結燈花愁不睡。酒闌無夢相逢。淒涼長判一生中。不如雲外月。永夜在房櫳。

虞美人

光化道中寄家

畫船穩泛春波渺。夕雨寒聲小。紫煙深處數峯橫。驚起一灘鷗鷺照川明。雨樓今夜歸期誤。恨入欄干暮。可堪春事滿春懷。不似珠簾新燕早歸來。

浣溪沙

王晉卿筵上作

風急花飛晝掩門。一簾殘雨滴黃昏。便無離恨也銷魂。翠被任熏
終不暖。玉盃慵舉幾番溫。箇般情事與誰論。

又

槐柳春餘綠漲天。酒旗高插夕陽邊。誰家牆裏笑鞦韆。往事不堪
樓上看。新愁多向曲中傳。此情銷得是何年。

又

一朶夢雲驚曉鴉。數枝春雨帶梨花。坐來殘月冷窗紗。釵鳳謾曾
留得半。枕山猶是枕時斜。對花今日奈天涯。

又

水滿池塘花滿枝。亂香深裏誤黃鸝。東風輕軟弄簾幃。日正長時
春夢短。燕交飛處柳煙低。玉窗紅子鬪碁時。

又

少日懷山老住山。一官休務得身閒。幾年食息白雲間。似我樂來
真是少。見人忙處不相關。養真高靜出塵寰。

鷓鴣天

前改張文潛詩。但有此四句。正爲成。平劉生作。余作後。改爲鷓鴣天贈之。

可是相逢意便深。爲郎巧笑不須金。門前一尺春風髻。窗內三更夜
雨衾。情渺渺。信沈沈。青鸞無路寄芳音。山城鍾鼓愁難聽。不解裏
王夢裏尋。

又

藍良輔知閩舟中晚坐會上作。

麝發雕爐小袖籠。天教我輩此時同。纔經霜重香方滿。菊到秋深色
自濃。船檻內。月明中。插花歸去莫匆匆。人生更在艱難內。勝事年
來不易逢。

王履道

案王安中字履道中山人有初寮集七十四卷初寮詞一卷

臨江仙

鳳撥鶻絃鳴永夜。眞疑人在潯陽。輕雲薄霧隔新妝。但聽兒女語。倏忽變軒昂。且看金泥花鄣面。指痕初印紅桑。幾多餘煖與眞香。移船猶自可。卷幕又何妨。

清平樂

煙雲千里。一抹西山翠。碧瓦紅樓山對起。樓下飛花流水。錦堂風月依然。後池蓮葉田田。縹緲貫珠歌裏。從容倒玉樽前。

御街行

謝賜衣襖

清霜飛入蓬萊殿。別進雲裘軟。却回宸意口。初寮詞作念多寒。詔語日邊親遣。冰蠶綿厚。金鷗錦好。永夜縫宮線。紅旌絳旆迎星傳。喜氣歡聲遠。廟堂勳舊使臺賢。領袖坐中爭綯。天香馥馥。君恩歲歲。一醉春

生面。

木蘭花

送歌
太尉

堯天雨露承新詔。珂馬風生趨急召。玉符曾將虎牙軍。金殿還陞龍尾道。征西鎮北功成早。仗鉞登臺今未老。樽前休更說燕然。且聽陽關三疊了。

清平樂

花時微雨。未減春分數。占取簾疎花密處。把酒聽歌金縷。斜風輕度濃香。閑情正與春長。向晚紅燈入坐。嘗新青杏催觴。

小重山

椽燭垂珠清漏長。酒黏衫袖濕。有餘香。紅牙雙捧旋排行。將歌處。相向更勻妝。明月映東牆。海棠花徑密。迸流光。遲留春筍緩催觴。蘭堂靜。人已候虛廊。

水龍吟

游池作三月十六日觀水嬉上梁鳳池
○游池作三月十六日觀水嬉上梁鳳池
○案初察詞云游御河並過壓沙寺作

魏臺長樂坊西。畫樓倒影煙波遠。東風與染，揉藍春水，灣環清淺。浴鷺翹莎。戲吹飛絮。初察詞作戲魚吹絮落紅漂卷。爲遊人盛縱。蘭舟綵舫。飛輕棹。凌波面。樂事年來乍見。趁旌旗、谷鶯嬌轉。追隨況有，珠簾紅袖，濃香紺幘。蕭寺高亭，茂林斜照，且留芳宴。看韶華爛向，樽前放手，作梨花晚。

蝶戀花

翠袖盤花金撚線。曉炙銀簧，勸初察作歡飲隨深淺。複幕重簾誰得見。餘曛微覺紅浮面。別喚清商開綺宴。玉管雙橫，抹起梁州遍。白紵歌前寒莫怨。湘梅萼裏春卹遠。

又

千古銅臺今莫問。流水浮雲，歌舞西陵近。煙柳有情看不盡。東風約

定年年信。天與麟符行樂分。帶緩裘輕。雅宴催雲鬢。翠霧縈紆銷篆印。箏聲恰度秋鴻陣。

江神子

寄李和武、翟淳老

荷花遮水水漫溪。柳低垂。亂蟬嘶。捨轡何妨臨水照征衣。一扇香風搖不盡。人念遠。意淒迷。騎鯨仙子已相知。數歸期。賦新詩。更想翟公門外雀羅稀。陶令此襟塵幾許。聊欲向。北窗披。

虞美人

贈李士美

清商初入昭華琯。宮葉秋聲滿。草麻初罷月嬋娟。想見明朝喜色動天顏。持盃滿勸龍頭客。榮遇時方得。詞源三峽瀉瞿塘。便是醉中宣去也無妨。

酒仙歌

深庭夜寂。但涼蟾如畫。鵲起高槐露華透。聽曲樓玉筩。吹徹涼州。

作一

伊金釧響，軋軋朱扉暗扣。迎人巧笑道，好箇今宵。怎不相尋暫攜
手。見淡淨晚妝殘，對月偏宜。多情更越饒纖瘦。甚怒一作早促分飛霎
時休。便恰似陽臺夢雲歸後。

一絡索

送王伯紹
帥慶陽

塞柳未傳春信。霜花侵鬢。送君西去指秦關。看日近。長安近。玉帳
同時英俊。合離無定。路逢新鴈北飛來。寄一字。燕山問。

六花隊冬詞。蝶戀花并口號。

長春花口號

露桃煙杏逐年新。回首東風迹已陳。頃刻開花公莫問。四時俱好
是長春。

詞

曲徑深叢枝裊裊。暈粉柔綿。破萼烘清曉。十二番開寒最好。此花不

恨春歸早。霜女飛來紅翠少。特地芳菲。絕豔驚衰草。只帶東風終甚了。久長欲伴姮娥老。

山茶口號

無窮芳草度年華。尚有餘寒幾種花。好在朱朱兼白白。一天飛雪映山茶。

詞

巧翦明霞成片片。欲笑還顰。金蕊依稀見。拾翠人寒妝易淺。濃香別注脣膏點。竹雀喧喧煙岫遠。晚色溟濛。六出花飛遍。此際一枝紅綠眩。畫工誰畫雲屏面。

蠟梅口號

雪裏園林玉作臺。侵寒須認暗香回。化工清氣先誰得。風格高奇是蠟梅。

詞

翦蠟成梅天著意。黃色濃濃。對萼勻裝綴。百和熏肌香旖旎。仙裳應
灑薔薇水。雪徑相逢人半醉。手折低枝。擁髻雲爭翠。馥蘂撚枝無
限思。玉眞未灑梨花淚。

紅梅口號

千林臘雪綴瑤瑰。晴日南枝暖獨回。却爲和羹尋鼎寶。未春先發
是紅梅。

詞

青玉枝頭紅顙吐。粉頰愁寒。濃與燕脂傅。辨杏猜桃君莫誤。天姿不
到風流處。雲破月來花上住。要共佳人。弄影參差舞。只有暗香來
繡戶。昭華一曲驚吹去。

迎春口號

年華節物欲爭新。翠袖朱顏一笑頻。勾引東風到池館。春花先作

花前自有迎春。

詞

雪霽花梢春欲到。殘臘迎春。一夜花開早。青帝回輿雲縹緲。鮮鮮金雀來飛繞。繡閣紗窗人嫋嫋。翠縷紅絲。鬪翦番兒小。戴在花枝爭笑道。願人常共春難老。

小桃口號

鴛瓦鋪霜朔吹高。畫堂歌筦醉香醪。小春特地風光好。嫩粉嬌紅看小桃。

詞

穠豔天桃春信漏。弄粉飄香。楓葉飛丹後。酒入冰肌紅欲透。無言不許羣芳鬪。欄外佳人呵玉手。初寮詞作翦落金刀。插處濃雲覆。肯

與劉郎仙去否。武陵回首相思瘦。

晁次膺

案晁端禮字次膺。有閒適集一卷。

水龍吟

夜來深雪前村路。應是早梅先綻。故人贈我。江頭春信。南枝向暖。疎影橫斜。暗香浮動。月明清淺。向庭邊驛畔。行人立馬。頻迴首。空腸斷。別有玉溪仙館。壽陽人。初勻妝面。天教占了。百花頭上。和羹未晚。最是關情處。高樓上。一聲羌管。仗誰人向道。爭如留取。倚朱欄看。

又

嶺梅香雪飄零盡。紅杏枝頭猶未。小桃一種。天饒偏占。春工用意。微噴丹砂。半含朝霧。粉牆低倚。正春寒露井。高樓簾外。爭凝睇。東風裏。好是佳人半醉。近橫波。一枝嬌媚。元都觀裏。武陵溪上。空隨流水。惆悵妖紅。雨風不定。五更天氣。念當年門裏。如今陌上。洒離人淚。

又

別本云。周紫芝詩。

小桃零落春將半。雙燕却來池館。名園相倚。初開繁杏。一枝遙見。竹外斜穿。柳閒深映。粉愁香怨。任紅欹宋玉。牆頭十里。曾牽惹。人腸斷。嘗記山城斜路。噴清香。日遲風暖。春陰趁後。馬前惆悵。滿枝紅一作淺。深院簾垂。雨愁人處。碎紅千片。到明年更發。多應更好。約隣翁看。

滿庭芳

天與疎慵。人憐憔悴。分甘拋棄簪纓。有時乘興。波上葉舟輕。十里橫塘。過雨。荷香細。蘋末風清。眞如畫。殘霞淡日。偏向柳梢明。凝情。塵網外。鱸魚旋膾。芳酒深傾。又算來何須。身外浮名。無限滄浪好景。菱笠下。且遣餘生。長歌去。機心盡矣。鷗鷺莫相驚。

又

綠遶羣峯。紅搖千柄。夜來暑雨初收。共君乘興。輕舸信悠悠。且盡一

樽別酒。荷香裏。滿酌輕甌。明朝去。征帆夜落。何處好汀洲。風流。吾
小阮。朝辭東觀。夕向南州。況聖時爭教。賈傅淹留。若遇潯陽亭上。琵琶
淚。莫灑清秋。堤邊柳。從今愛惜。留待繫歸舟。

又

雪滿貂裘。風搖金纜。笑看錦帶吳鉤。照人青鬢。年少定封侯。此去馬
蹄何處。山萬疊。濟水南州。君知否。盧郎未老。曾是恣狂遊。風流。佳
麗地。十年屈指。一夢回頭。最難忘西湖。北渚澄秋。玉砌雕欄好在。桃
共李。曾憶人否。衰翁也。多情爲我。將恨寄紅樓。

又

北渚澄瀾。南山凝翠。望中渾是仙鄉。萬家煙靄。朱戶鎖垂楊。好似飛
泉漱玉。迴環遍。小曲深坊。西風裏。芙蓉帶雨。飄散滿城香。微涼。湖
上好。橋虹倒影。月練飛光。命珎簪促席。雲鬢分行。誰似風流太守。端

解道春草池塘。須留戀。神京縱好。此地也難忘。

鴨頭綠

錦堂深。獸爐一噴沈煙。紫檀槽、金泥花面。美人斜抱當筵。掛羅綬、素肌瑩玉。近鸞翅、雲鬢梳蟬。玉笋輕籠。魚紋細抹。鳳凰飛出四條絃。碎牙板、頰襟消盡。秋氣滿庭軒。今宵月、依稀向人。欲鬪嬋娟。變新聲、能翻往事。眼前風景依然。路漫漫。漢妃出塞。夜悄悄。商婦移船。馬上愁思。江邊怨感。分明都向曲中傳。困無力、勸入金盞。須要倒垂蓮。拚沈醉、身世恍然。一夢遊仙。

又

晚雲收。淡天一片琉璃。爛銀盤、來從海底。皓色千里澄輝。瑩無塵、素娥澹泞。靜可數、丹桂參差。玉露初零。金風未凜。一年無似此佳時。向坐久、疎星時度。烏鵲正南飛。瑤臺冷。攔干凭暖。欲下遲遲。念佳人、

音塵隔後。對此應解相思。最關情、漏聲正永。暗斷腸、花影潛移。料得來宵。清光未減。陰晴天氣又爭知。共凝戀、如今別後。還是隔年期。人縱健。清樽素月。長願相隨。

清平樂

深沈玉宇。枕簟清無暑。睡起花陰初轉午。一霎飛雲過雨。雨餘隱隱殘雷。夕陽却照庭槐。莫把珠簾垂下。妨他雙燕歸來。

醉桃源

又是青春將暮。望極桃源歸路。洞戶悄無人。空鎖一庭紅雨。凝佇凝佇。人面不知何處。

行香子

別恨綿綿。屈指三年。再相逢、情分依然。君初霜鬢。我已華顛。況其間、有多少、恨不堪言。小亭幽檻。菊蕊爛斑。近清宵、月已嬋娟。莫思身

外。且鬪樽前。願花長好。身長健。月長圓。

驀山溪

風流心膽。直把春償酒。選得一枝花。綺羅中。算來未有。名園翠苑。風月最佳時。夜迢迢。車款款。是處曾攜手。重來一夢。池館皆依舊。幽恨寫新詩。托何人。章臺問柳。漁舟歸後。雲鎖武陵溪。水潺潺。花片片。艤棹空回首。

又

輕衫短帽。重入長安道。屈指十年中。一迴來。一迴漸老。朋游在否。落托更能無。朱絃悄。知音少。撥斷相思調。花邊柳外。蕭灑愁重到。深院鎖春風。悄無人。桃花自笑。金釵一股。擬欲問音塵。天杳杳。波渺渺。何處尋蓬島。

菩薩蠻

午陰未轉晴窗暖。無風著地楊花滿。睡起日猶長。捲簾紅杏香。春
心無處定。又作花時病。芳草伴離愁。綿綿早晚休。

又

百花未報芳菲信。一枝探得春風近。只有雪爭光。更無花似香。孤
標天賦與。冷豔誰能顧。庭院好深藏。莫教開路傍。

又

紋迴

捲簾風入雙雙燕。燕雙雙。入風簾捲。明月曉啼鶯。鶯啼曉月明。斷
腸空望遠。遠望空腸斷。樓上幾多愁。愁多幾上樓。

又

遠山眉映橫波臉。臉波橫映眉山遠。雲鬢插花新。新花插鬢雲。斷
魂離思遠。遠思離魂斷。門掩未黃昏。昏黃未掩門。

少年遊

建溪靈草已先嘗。歡意尙難忘。未放笙歌暫留簪珮。猶有紫芝湯。
醉中纖手殷勤捧。欲去斷人腸。絳蠟迎歸。繡鞍扶下。笑語盡聞香。

晁叔用

案晁冲之字叔用一字用道鉅野人有具茨集十五卷詞一卷

漢宮春

黯黯離懷。向東門繫馬。南浦移舟。薰風亂飛燕子。時下輕鷗。無情渭水。問誰教、日日東流。常是送、行人去後。煙波一向離愁。回首舊遊如夢。記踏青帶飲。拾翠狂遊。無端綵雲易散。覆水難收。風流未老。拚千金、重入揚州。應又是、當年載酒。依前名占青樓。

玉蝴蝶

目斷江南千里。灞橋一望。煙水微茫。盡鎖重門。人去暗度流光。雨輕輕、梨花院落。風淡淡、楊柳池塘。恨偏長。珮沈湘浦。雲散高唐。清狂。重來一夢。手搓梅子。煮酒初嘗。寂寞經春。小橋依舊燕飛忙。玉鉤欄、凭多漸暖。金縷枕、別久猶香。最難忘。看花南陌。待月西廂。

感皇恩

一作周邦彥作

小閣倚晴空。數聲鐘定。寸柄寒垂暮天淨。朝來殘酒。盡被曉風吹醒。眼前還認得。當時景。
舊恨與新愁。一作往事。不堪重省。自歎多情更
多病。綺筵猶在。一作綺窗。依舊。敲遍闌干誰應。斷腸明月下。梅搖影。

又

蝴蝶滿西園。啼鶯無數。水閣橋南路。擬佇。兩行煙柳。吹落一池飛絮。秋千斜掛起。人何處。把酒勸君。閒愁莫訴。留取笙歌住。休去。幾多
春色。禁得許多風雨。海棠花謝也。君知否。

又

寒食不多時。牡丹初賣。小院重簾燕飛礙。昨宵風雨。只有一分春在。今朝猶自得。陰晴快。熟睡起來。宿醒微帶。不惜羅襟揜眉黛。日高梳洗。看著花陰移改。笑摘雙杏子。連枝戴。

臨江仙

雙舸亭亭橫晚渚。城中飛觀嵯峨。畫橋燈火照清波。玉鉤平浸水。金鎖半沈河。試問無情堤上柳。也應厭聽離歌。人生無奈別離何。夜長嫌夢短。淚少怕愁多。

又

憶昔西池池上飲。年年多少歡娛。別來不寄一行書。尋常相見了。猶道不如初。安穩錦屏今夜夢。月明好渡江湖。相思休問定何如。情知春去後。管得落花無。

又

謾道追歡惟九日。年年此恨偏濃。今朝吹帽與誰同。黃花都未折。和淚泣西風。應念一作恐登臨腸更斷。故交煙雨迷空。爲君一曲送飛鴻。誰能推轂我。深入醉鄉中。

漁家傲

浦口潮來沙尾漲。危檣半落帆浮。一作漾。水調不知何處唱。風飄一作淡。蕩。鰕魚吹起桃花浪。雪盡小橋梅總放。層樓一任愁人上。萬里長安回首望。山四向。澄江日色如春釀。

傅信玉女

一夜東風吹散柳梢殘雪。御樓煙暖。正鼇山對結。簫鼓向晚。鳳輦初歸宮闕。千門燈火。九街風月。繡閣人人乍嬉遊。困又歇。笑勻妝面。一作豔。妝初試。把珠簾半揭。嬌波向人。手撚玉梅低說。相逢常是。上元時節。

如夢令

簾外新來雙燕。珠閣瓊樓穿遍。香徑得泥歸。飛戲池塘波面。誰見誰見。春晚昭陽宮殿。

又

牆外轆轤金井。驚夢瞢騰初省。深院閉斜陽。燕入陰陰簾影。人靜人

靜。花落烏啼風定。

又

門在垂楊陰裏。樓枕曲江春水。一陣牡丹風。香壓滿園花氣。沈醉沈醉。不記綠窗先睡。

樂府雅詞卷五

陳去非

案陳與義字去非號簡齋洛陽人有簡齋集十六卷無住詞一卷

世傳頃年都下市肆中有道人攜烏衣椎髻女子買斟酒獨飲。女子歌詞以侑。凡九闕。皆非人世語。或記之。問一道士。道士驚曰。此赤城韓夫人所製。水府蔡真君法駕導引也。烏衣女子疑龍云。得其三而亡其六。擬作三闕。

朝元路。朝元路。同駕玉華君。千乘載花紅一色。人間遙指是祥雲。回望海光新。

東風起。東風起。海上百花搖。十八風鬟雲半動。飛花和雨著輕綃。歸路碧迢迢。

簾漠漠。簾漠漠。天澹一簾秋。自洗玉舟斟白醴。月華微映是空舟。歌

罷海西流。

虞美人

亭下桃花盛開
作長短句詠之

十年花底承朝露。看到江南樹。洛陽城裏又東風。未必桃花得似舊時紅。燕脂睡起春纔好。應恨人空老。心情雖在只吟詩。白髮劉郎孤負可憐枝。

雙荷葉

五日移舟
明山下作

魚龍舞。湘君欲下瀟湘浦。瀟湘浦。興亡離合。亂波平楚。獨無樽酒酬端午。移舟來聽明山雨。明山雨。白頭孤客。洞庭懷古。

臨江仙

高詠楚詞酬午日。天涯節序。匆匆榴花不似舞裙紅。無人知此意。歌罷滿簾風。萬事一身傷老矣。戎葵疑笑牆東。酒盃深淺去年同。試澆橋下水。今夕到湘中。

虞美人

大光祖席辭
中賦長短句

張帆欲去仍搔首。更醉君家酒。吟詩日日待春風。及至桃花開後卻
忽忽。歌聲頗爲行人咽。記著樽前雪。明朝酒醒大江流。滿載一船
離恨向衡州。

又

邢子友
會上

超然堂上閑賓主。不受人閒暑。冰壺圍坐此閒無。卻有一瓶和露玉
芙蓉。亭亭風骨涼生牖。消盡樽中酒。酒闌踏明一作月轉城西。照見
紗巾藜杖帶香歸。

又

予甲寅歲自鎮闈以病得請奉祠卜居青墩鎮立秋後三日行
舟之前後如明霞相映望
之不斷也以長短句記之

扁舟三日秋塘路。平度荷花去。病夫因病得來遊。更值滿川微雨洗
新秋。去年長恨拏舟晚。空見殘荷滿。今年何以報君恩。一路繁花

相送到青墩。

點絳脣

寒食今年紫陽山下蠻江左。竹籬煙鎖。何處來新火。不解鄉音只怕人嫌我。愁無那。短歌誰和。風動梨花朵。

漁家傲

福建道中

今日山頭雲欲舉。青蛟素鳳移時舞。行到石橋聞細雨。聽還住。風吹却過溪西去。我欲尋詩寬久旅。桃花落盡春無所。渺渺籃輿穿翠楚。悠然處。高林忽送黃鸝語。

浣溪沙

離杭日。梁仲謀惠酒極清而美。七月十二日晚臥小閣已而月上。獨酌數盃。

送了棲鴉復暮鐘。闌干生影曲屏東。臥看孤鶴駕天風。起寫一樽明月下。秋空如水酒如虹。謫仙已去與誰同。

木蘭花

青墩會舍作

山人本合居巖嶺。聊問支郎分半境。殘年藜杖與綸巾。八尺庭中時
弄影。呼兒汲水添茶鼎。甘勝吳山山下井。一甌清露一爐雲。偏覺
平生今日永。

清平樂

黃衫相倚。翠葆層層底。八月江南風日美。弄影山腰水尾。楚人未
識孤妍。離騷遺恨千年。無住菴中新事。一枝喚起幽禪。楚人未
作三人間。

定風波 重陽

九日登臨有故常。隨晴隨雨一傳觴。多病題詩無好句。孤負。黃花今
日十分黃。記得眉山文翰老。曾道。四時佳節是重陽。江海滿前懷
古意。誰會。闌干三撫獨淒涼。

菩薩蠻 荷花

南軒面對芙蓉浦。宜風宜月還宜雨。紅少綠多時。簾前光景奇。繩

牀烏木几。盡日繁香裏。睡起一篇新。與花爲主人。

南歌子

塔閣院僧閣

矯矯千年鶴。茫茫萬里風。闌干三面看秋空。背插浮屠千尺冷煙中。
林塢村村暗。谿流處處通。此閒何似玉霄峰。遙望蓬萊依約晚雲東。

臨江仙

夜登小閣憶洛中舊遊

憶昔午橋橋上飲。坐中多是豪英。長溝流月去無聲。杏花疎影裏。吹
笛到天明。二十餘年如一夢。此身雖在堪驚。閒登小閣看新晴。今
古多少事。漁唱起三更。無住詞作兩三聲

蘇養直

案蘇庠字養直丹陽人。有後湖詞一卷。

臨江仙

席上贈張建康。

本是白蘋洲畔客。虎符臥鎮江城。歸來猶得趁鷗盟。柳絲搖曉市。杜若遍芳汀。莫惜飛觴仍墮幘。柳邊依約鶯聲。水秋鱸熟正關情。只愁宣室召。未許釣船輕。

又

獵獵風蒲初暑過。蕭然庭戶秋清。野航渡口帶烟橫。晚山千萬疊。別鶴兩三聲。秋水芙蓉聊蕩槳。一樽同破愁城。藜花灘上白鷗明。暮雲連極浦。急雨暗長汀。

如夢令

雪中作。

疊嶂曉埋煙雨。忽作飛花無數。整整復斜斜。來伴南枝清苦。日暮日暮。何許雲林煙樹。

虞美人

次俞仲登韻

軍書未息梅仍破。穿市溪流過。病來無處不關情。一夜鳴榔急雨雜灘聲。飄零無復還山夢。雲屋春寒重。山連積水水連空。溪上青蒲短短柳重重。

浣溪沙

書虞元翁書

水榭風微玉枕涼。牙牀角簟藕花香。野塘煙雨罩鴛鴦。紅蓼渡頭青嶂遠。綠蘋波上白鷗雙。淋浪淡墨水雲鄉。

謁金門

懷故居作

何處所。門外冷雲堆浦。竹裏江梅寒未吐。茅屋疎疎雨。誰遣愁來如許。小立野塘官渡。手種凌霄今在否。柳浪迷煙渚。

又

大葉莊懷張元孺作

楊柳渡。醉著青鞋歸去。點點鷗波何處所。十里菰蒲雨。抖擻向來

塵土。臥看碧山雲度。寄語故時猿鶴侶。未見心先許。

鷓鴣天

楓落河梁野水秋。澹煙衰草接郊邱。醉眠小塢黃茅店。夢倚高城赤
葉樓。天杳杳。路悠悠。鈿箏歌扇等閒休。灞橋楊柳年年恨。鴛浦芙
蕖葉葉愁。

又

過湖陰。席
上贈妓。

梅妒晨妝雪妬輕。遠山依約學眉青。樽前無復歌金縷。夢覺空餘月
滿林。魚與雁。兩浮沈。淺顰微笑總關心。相思恰似江南柳。一夜春
風一夜深。

又

秋入蒹葭小鴈行。參差飛墮水雲鄉。直須銀甲供春筍。且滴糟牀覆
羽觴。風壓幕。月侵廊。江南江北夜茫茫。懸知上馬啼鷓夢。一夜驚

飛寶鴨香。

訴衷情

漁父家風。醉中贈韋道士。

杖頭挑得布囊行。活計有誰爭。不肯侯家五鼎，碧澗一盃羹。谿上

月，嶺頭雲。不勞耕。甕中春色，枕上華胥，便是長生。案張元幹以訴家情令改名漁父

風與訴衷情不同。故原本註明題上。

又

倦投林樾當誅茅。鴻鴈響寒郊。溪上晚來楊柳，月露洗煙梢。霜後
渚，水分槽。尚平橋。客牀歸夢，何必江南，門接雲濤。

阮郎歸

西園風暖落花時。綠陰鶯亂啼。倚闌無語惜芳菲。絮飛蝴蝶飛。綠
底事，減腰圍。遣愁愁著眉。波連春渚暮天垂。燕歸人未歸。

點絳脣

冰勒輕颺。綠痕初漲。迴塘水。柳洲煙際。白鷺翹沙背。蒨笠青蓑未。
減貂蟬貴。雲濤裏。醉眠蓬底。不屬人閒世。

菩薩蠻

宜興作

北風振野雲平屋。寒溪浙浙流冰谷。落日送歸鴻。夕嵐千萬重。荒
坡垂斗柄。直北鄉山近。何必苦言歸。石亭春滿枝。

又

自宜興還
西岡作

園林寂寂春歸去。濛濛柳下飛香絮。野水接雲橫。綠煙啼曉鶯。
江
南鷓鴣夢。山色朝來重。小艇小灣頭。蘋花蘋葉洲。

又

再在西岡兼
懷後湖作

短船誰泊蒹葭渚。夜深遠火明漁浦。卻憶槿花籬。春聲穿竹溪。
雲
山如昨好。人自垂垂老。心事有誰知。月明霜滿枝。

又

周彥達
舟中作

眼中疊疊煙中樹。晚雲點點翻荷雨。鷗泛渚邊煙。綠蒲秋滿川。未
成江海去。聊作林塘主。客恨闊無津。風斜白氎巾。

又

年時憶著花前醉。而今花落人憔悴。麥浪卷晴川。杜鵑聲可憐。有
書無雁寄。初夏槐風細。家在落霞邊。愁逢江月圓。

又

滎陽莊

照溪梅雪和煙墮。寒林漠漠愁煙鎖。客恨渺無涯。鴈來人憶家。遠
山疑帶雨。一線雲閒語。霜月又嬋娟。江南若箇邊。

又

春波澹澹浮春渚。綠陰一徑風兼雨。又作去年時。綠深垂蔓籬。故
山歸興動。江北江南夢。白髮故相欺。星星如有期。

木蘭花

江雲疊疊遮鴛浦。江水無情流薄暮。歸帆初張葦邊風。客夢不禁篷背雨。諸花不解留人住。只作深愁無盡處。白沙煙樹有無中。鴈落滄洲何處所。

清平樂

詠桂巖

斷崖流水。香度青林底。元配騷人蘭與芷。不數春風桃李。淮南叢桂小山。詩翁合得攀翻。身到十洲三島。心遊萬壑千巖。

李蕭遠

案李祁字蕭遠。

減字木蘭花

梨花院宇。澹月微雲初過雨。一枕輕寒。夢入西瑤小道山。花深人靜。簾鎖御香清晝永。紅藥欄干。玉案春風窈窕閒。

點絳脣

樓下清歌。水流歌斷春風暮。夢雲煙樹。依約江南路。碧水黃沙。夢到尋梅處。花無數。問花無語。明月隨人去。

青玉案

綠璫窗紗明月透。正清夢、鶯啼柳。碧井銀瓶鳴玉甃。翔鸞妝樣。粲花衫繡。分付春風手。喜入秋波嬌欲溜。脈脈青山兩眉秀。玉枕春寒郎知否。歸來留取。御香襟袖。同飲醪醑酒。

鵲橋仙

玉蘂飲瓊腴。不須紅袖扶。少年隨意數花鬚。老來心已無。

探梅早春亭。踰鳳棲嶺。至三山閣。折花而歸。用歐公朝中措腔。作照江梅詞。寄任蘊明。蘊明嘗許緣檄載侍兒見過。又于漢籍伎有目成者。因以爲戲。

郎官湖上探春迴。初見照江梅。過盡竹溪流水。無人知道花開。佳人何處。江南夢遠。殊未歸來。喚取小叢教看。隔江煙雨樓臺。

西江月

拾翠亭前水滿。郎官湖上春迴。儀龍新碾試瓊盃。更覺春江有味。拄杖行穿翠篠。吹花醉繞江梅。故園心事老相催。此意陶潛能會。

又

雲觀三山清露。長生萬鬣青松。瓊瑤珠珥下秋空。一笑滿天鸞鳳。霧鬢新梳紺綠。霞衣舊佩柔紅。更邀豪俊馭南風。此意平生飛動。

如夢令

春水湖塘深處。竹暗沙洲無路。閒伴落花來。卻信東風歸去。且住且住。細看兩山煙雨。

又

不見玉人清曉。長歎一聲雲杪。碧水滿闌塘。竹外一枝風裊。奇妙奇妙。半夜山空月皎。

水龍吟

郎官湖

碧山橫繞清湖。茂林秀麓波光裏。南宮老大。西洲漂蕩。危亭重倚。步
雨行雲。餌風飲霧。平生遊戲。笑此中空洞。都無一物。有神妙。浩然氣。
掃盡雲南夢北。看三江五湖秋水。狂歌兩解。清樽一舉。超然千里。
江漢蒼茫。故人何處。山川良是。待白蘋露下。青天月上。約騎鯨起。

浪淘沙

拍手趁西風。驚起乖龍。青山綠水古今同。惟有一輪山上月。長照江
中。一點落金鐘。渾似虛空。道人不住有雲峯。但是人家清酒甕。行
處相逢。

呂居仁

案呂本中字居仁金華人。有東萊集二十二卷。

采桑子

恨君不似江樓月。南北東西。南北東西。只有相隨無別離。
恨君卻似江樓月。暫滿還虧。暫滿還虧。待得團圓是幾時。

又

亂紅天綠風吹盡。小市疎樓。細雨輕鷗。總向離人恨裏收。
年年春好年年病。妾自西遊。水自東流。不似殘花一樣愁。

西江月

渺渺風吹月上。濛濛霧挾霜迴。百年心事老相催。人在夕陽落外。
有夢常嫌去遠。無書可恨來遲。一盃濁酒兩篇詩。小檻黃花共醉。

又

熟水詞。

酒罷悠揚醉興。茶烹喚起醒魂。卻嫌仙劑點甘辛。衝破龍團氣韻。

金鼎清泉乍瀉。香沈微惜芳薰。玉人歌斷恨輕分。歡意厭厭未盡。

朝中措

病香無力傍欄干。風雨送春還。一枕曉來清夢，無人說似西山。匆
匆笑語，時時邂逅，草草盃盤。莫謂雜花時候，便忘梅蘂衝寒。

南歌子

驛路侵斜月。溪橋度曉霜。短籬殘菊一枝黃。正是亂山深處，過重陽。
旅枕元無夢，寒更每自長。只言江左好風光。不道中原歸思，轉淒涼。

虞美人

梅花自是于春嬾。不是春來晚。看伊開在衆花前。便道與春無分結
因緣。風前月下頻相就。笑我如伊瘦。幾回衝雨過疎籬。已見一番
青子綴殘枝。

又

平生臭味如君少。自是君難老。似儂憔悴更誰知。只道心清不似少年時。春風也到江南路。小檻花深處。對人不是憶姚黃。實是舊時風味老難忘。

浣溪沙

暝日溫風破淺寒。短青無數簇幽欄。三年春在病中看。中酒心情渾似夢。探花時候不曾閒。幾年芳信隔秦關。

又

共飲昏昏到暮鴉。不須春日念京華。邇來沈醉是生涯。不是對君猶惜醉。只嫌春病卻憐他。願爲蜂採落殘花。

長相思

要相忘。不相忘。玉樹郎君月艷娘。幾回曾斷腸。欲下牀。卻上牀。上

得牀來思舊鄉。北風吹夢長。

減字木蘭花

去年今夜同醉月。明花樹下。此夜江邊。月暗長堤柳暗船。故人同處。帶我離愁江外去。來歲花前。又是今年憶昔年。

菩薩蠻

客愁不到西池路。殘春又逐花飛去。今日傍池行。新荷昨夜生。故人千慮繞。不道書來少。去住隔關河。長亭風雨多。

又

高樓只在斜陽裏。春風淡蕩人聲喜。攜客不嫌頻。使君如酒醇。花光人不會。月色須君醉。月色與花光。共成今夜長。

又

登樓一望南山雪。使君風味如新月。月向雪前明。主人今夜情。平

生相與意。老病猶堪記。對酒爲君歡。酒盃嫌未寬。

踏莎行

雪似梅花。梅花似雪。似和不似都奇絕。惱人風味阿誰知。請君問取南樓月。記得舊時。探梅時節。老來舊事無人說。爲誰醉倒爲誰醒。到今猶恨輕離別。

清平樂

故人何處。同在江南路。百種舊愁分不去。枉被落花留住。舊愁百種誰知。除非是見伊時。最是一春多病。等閒過了酴醾。

漁家傲

小院悠悠春未遠。牡丹昨夜開猶淺。珍重使君簾盡捲。風欲轉。綠陰掩映闌干晚。記得舊時清夜短。洛陽芳訊時相伴。一朵姚黃鬆髻滿。情未展。新來衰病無人管。

生查子

殘春霧雨餘。小院黃昏後。說道覓新詞。把酒來相就。
醪醑插髻雲。
歲歲長如舊。不是做詞遲。卻怕添伊瘦。

毛澤民

案毛滂字澤民。衢州人。有東堂集十卷。東堂詞一卷。

水調歌頭

元會曲

九金增宋重。八玉變秦餘。千年清浸先淨。河洛出圖書。一段昇平光景。不但五星循軌。萬點共連珠。垂衣本神聖。補袞妙工夫。朝元去。鏘環珮。冷雲衢。芝房雅奏。儀鳳矯首聽笙竽。天近黃麾仗曉。春早紅鸞扇暎。遲日上金鋪。萬歲南山色。不老對唐虞。

浣溪沙

詠梅

月樣嬋娟雪樣清。索強先占百花春。於中燭底好精神。多恨肌膚元自瘦。半殘妝粉不吹勻。十分全似那人人。

又

初春汎舟。時北山積雪盈尺。而水南梅林盛開。

水北煙寒雪似梅。水南梅鬪雪千堆。月明南北兩瑤臺。雪近卻如天上坐。魂清疑向斗邊來。梅花多處載春回。

又泛舟。

銀字笙簫小小童。梁州吹過柳橋風。阿誰勸我玉盃空。小醉徑須
眠錦瑟。夜歸不用簇紗籠。畫船簾捲月明中。

玉樓春

立春

小園半夜東風轉。吹破冰池雲母面。曉披閭闔見朝陽。和向碧階添
幾線。小煙弄柳晴先暝。殘雪禁梅香尙淺。慙慙洗拂舊東君。多少
韶華都借看。

惜分飛

富陽水寺
秋夕望月

山轉沙回江漸小。望盡冷煙衰草。夢斷瑤臺曉。楚雲何處英英好。
古寺黃昏人悄悄。簾捲寒堂月到。不會思量了。素光看盡桐陰少。

又

富陽僧舍
代作別語

淚溼闌干花著露。秋到眉峯碧聚。此恨平分取。更無言語空相覩。

短雨殘雲無意緒。寂寞朝朝暮暮。今夜山深處。斷魂分付潮回去。

西江月

縣圃去酌

煙雨半藏楊柳。風光初到桃花。玉人細細酌流霞。醉裏將春留下。柳畔鴛鴦作伴。花邊蝴蝶爲家。醉翁醉裏也隨他。月在柳橋花榭。

又

長安秋夜與諸君飲分題作

雨後袂衣初冷。霜前細菊渾斑。觚棱清月繡團環。萬里長安秋晚。槽下內家玉滴。盤中江國金丸。春容著面作微殷。燭影紅搖醉眼。

又茶詞

席上芙蓉待暝。花閒騖裏還嘶。勸君不醉且無歸。歸去因誰惜醉。雪點餅心未老。乳堆盞面初肥。留連能得幾多時。兩腋清風喚起。

青玉案

新涼

芙蓉花上濛濛雨。又冷落池塘暮。何處風來搖碧戶。捲簾凝望。淡煙

疎柳。翡翠穿花去。玉京人去無由駐。忍獨在、凭闌處。試問綠窗秋到否。可人今夜。新涼一枕。無計相分付。

踏莎行 臘梅

粟玉玲瓏。雍酥浮動。芳跗染得胭脂重。風前蘭麝作香寒。枝頭烟雪和春凍。蜂翅初開。蜜房香弄。佳人寒睡愁和夢。鵝黃衫子茜羅裙。風流不與江梅共。

曾公袞

案會紆字公袞南豐人。有空青遺文十卷。

秋霽

木落山明。莫江碧。樓倚太虛寥廓。素手飛觴。釵頭笑取。金英滿浮桑落。鬢雲漫約。酒紅拂破香腮薄。細細酌。簾外任教月轉。畫闌角。當年快意登臨。異鄉節物。難禁離索。故人遠。凌波何在。惟有殘英共寂寞。愁到斷腸無處著。寄寒香與。憑渠問訊。佳時弄粉吹花。爲誰梳掠。

念奴嬌

片帆暮落。正前村梅蘂。愁人如雪。東陌西溪。長記得。疎影橫斜時節。六出冰姿。玉人微步。笑裏輕輕折。蘭房同醉。暗香曾共私竊。回頭萬水千山。一枝重見處。離腸千結。料想臨鸞消瘦損。時把啼紅偷浥。怎得伊來。許多幽恨。共撚青梢說。如今千里。斷腸空對明月。

又

江城春晚。正海棠臨水。嫣然幽獨。秀色天姿眞富貴。何必金盤華屋。月下無人。雨中有淚。絕艷仍清淑。豐肌得酒。嫩紅微透。輕縠。霧靄林深。佳人春睡思。朦朦初足。笑出疎籬。端可厭。桃李漫山麤俗。銜子飛來。鴻鵠何在。千里移西蜀。明朝酒醒。亂紅那忍輕觸。

洞仙歌

相如當日。曾奏凌雲賦。落筆縱橫妙風雨。記揚鞭輦路。同醉金明。窮勝賞。不管重城已暮。舊遊如夢覺。零落朋儕。遺墨淋漓尙如故。況神州北望。今已邱墟。傷白壁。久埋黃土。但空似。靈光巍然存。悵朗月清風。更無元度。

臨江仙

後院短牆臨綠水。春風急管繁絃。問誰親按小嬋娟。玉堂眞學士。琳館地行仙。安得此身來此處。依稀一夢梨園。江南刺史漫垂涎。據

鞍腸已斷。何況到尊前。

上林春

東里梅繁。豪健放樂。醉倒花前狂客。艷妝微步。攀條弄粉。凌波遍尋青陌。暗香墮。更飄近、霧鬢蟬額。倒金荷。念流光易失。幽姿堪惜。惜花心未甘鬢白。南枝上、又見尋芳消息。舊遊回首。前歡如夢。誰知等閒拋擲。稠紅亂縈。漫開遍、楚江南北。獨消魂。念誰寄、故園春色。

菩薩蠻

山光冷浸清溪底。溪光直到柴門裏。臥對白蘋洲。欹眠數釣舟。溪山無限好。恨不相逢早。老病獨醒多。如此良夜何。

謁金門

風漸瀝。簾外雪花初積。夢破小窗人寂寂。寒微無處敵。強起飲君涓滴。清淚醉來霑臆。歧路只今多擁隔。弟兄無信息。

品令

紋漪漲綠。疎靄連孤鷺。一年春事。柳飛輕絮。筍添新竹。寂寞幽花獨。
殿小園嫩綠。登臨未足。悵遊子、歸期促。他年清夢。千里猶到。城陰
溪曲。應有淩波。時爲故人凝目。

李景元

案李甲字景元華亭人

望雲涯引

秋容

一作空

江上。岸花老。蘋洲白。露溼蒹葭。浦嶼漸增寒色。閒漁唱晚。

鶯鴈驚飛處。映遠磧。數點輕帆。送天際歸客。

鳳臺人散。漫回首。沈

消息。素鯉無憑。樓上暮雲凝碧。

詞緯有危樓靜倚四字

時向西風下。認遠笛。宋

玉悲懷。未信金樽消得。

弔嚴陵

蕙蘭香泛。孤嶼潮平。驚鷗散雪。迤邐點破。澄江秋色。暝靄向歛。疎雨乍收。染出藍峯千尺。魚舍孤煙鎖寒磧。畫鷁翠帆旋解。輕艤晴霞岸側。正念往悲酸。懷鄉慘切。何處引羌笛。追惜當時富春佳地。嚴光釣址空遺迹。華星沈後。扁舟泛去。瀟灑閑名圖籍。離觴弔終一作古。寓目意斷魂消。淚滴。漸洞天晚。一作曉。迴首暮雲千里碧。

夢玉人引

漸東風暖。隴梅殘。霽雲碧。嫩草柔條。又迴江城春色。乍促銀籤。便篆香紋蠟有餘迹。愁夢相兼。儘日高無力。這些離恨。依然是酒醒又如織。料伊情懷。也應向人端的。何故近日。全然無消息。問伊看伊。教人到此。如何休得。

過秦樓

賣酒壚邊。尋芳原上。亂花飛絮悠悠。已蝶稀鶯散。便擬把長繩。繫日無由。謾道草忘憂也。徒將酒解閑愁。正江南春盡。行人千里。蘋滿汀洲。有翠紅徑裏。盈盈似簇。芳茵禊飲。時笑時謳。當暖風遲景。任相將。永日爛漫從狂。作遊。誰信盛狂中。有離情。忽到心頭。向樽前擬問。雙燕來時。曾過秦樓。

帝臺春

芳草碧色。萋萋遍南陌。暖絮亂紅也。似一本有知人春愁無力。憶得盈盈盈拾翠侶。共攜賞。鳳城寒食。到今來。海角逢春。天涯爲客。愁旋釋。還似織。淚暗拭。又偷滴。謾竚立。立一本無竚倚遍危欄。儘黃昏也。只是暮雲凝碧。拚則而今已拚了。忘則怎生便忘得。又還問鱗鴻。試重本一

有尋

消息。

擊梧桐

杳杳春江闊。收細雨、風蹙波聲無歇。雁去汀洲暖。岸蕪靜、翠染遙山一抹。羣鷗聚散。征航來去。隔水相望楚越。對此凝情久。念往歲、上國嬉遊時節。鬪草園林。賣花巷陌。觸處風光奇絕。正恁濃歡裏。悄不意、頓有天涯離別。看那梅生翠實。柳飄狂絮。沒箇人共折。把而今、愁煩滋味。教向誰說。

幔卷綢

絕羽沈鱗。埋花葬玉。杳杳悲前事。對一盞寒燈。數點沈螢。悄悄畫屏。
巫山十二。薜臉星眸。蕙情蘭性。一旦成流水。便縱有、甘泉妙手。鴻都
方士何濟。香閨寶砌臨妝處。一本無處字。迤邐苔痕翠。更不忍看伊繡
殘鴛侶。一作履。而今尚有。啼紅粉漬。好夢不來。斷雲飛去。黯黯情無際。
謾飲盡香醪。奈向愁腸。消遣無計。

望春回

霽霞散曉。射水村漸明。漁火方絕。一作滅。灘露夜潮痕注。凍瀨淒咽。征
鴻來時應負書。一作有信。一作附。見疎柳更憶伊同折。異鄉憔悴。那堪更逢。
一作值。歲窮時節。東風暗回暖律。算坵遍江梅。消盡巖雪。唯有這愁
腸也。依舊千結。私言竊語。此三會一作誓約。便眠思。夢想無休歇。這些離
恨。除非對著。說似明月。

向伯恭

案向子謹字伯恭自號鶴林臨江人有酒邊詞一卷

清平樂

詠木樨贈韓叔夏

吳頭楚尾。踏破芒鞋底。萬壑千巖秋色裏。不奈惱人風味。如今老我薌林。世閒百不關心。獨喜愛香韓壽。能來同醉花陰。

鷓鴣天

紫禁煙花一萬重。鰲山宮闕倚晴空。玉皇端拱彤雲上。人物嬉遊陸海中。星轉斗。駕迴龍。五侯池館醉春風。而今白髮三千丈。愁對寒燈數點紅。

虞美人

和趙正之韻時正之被召

淮陽堂上曾相對。笑把姚黃醉。十年離亂有深憂。白髮蕭蕭同見渚江秋。履聲細聽知何處。欲上星辰去。清寒初溢暮雲收。更看碧天如水月如流。

又

示棲隱
甯老

澄江霽月清無對。魯酒何須醉。人憐貧病不堪憂。誰識此心如月正
含秋。再三勞漉方知處。試向波心去。迢迢空切勿能收。漫道從來
天地與同流。

卜算子

中秋和
東坡

雨意挾風回。月色兼天靜。心與秋空一樣清。萬象森如影。何處一
聲鐘。令我發深省。獨立滄浪忘卻歸。不覺霜華冷。

又

雙原避
地作

時菊碎榛叢。地僻柴門靜。誰道村中好客稀。明月和清影。天地一
蘧廬。夢事慵思省。若箇知余懶是真。心已如灰冷。

又

竹裏一枝梅。雨洗娟娟淨。疑是佳人日暮來。綽約風前影。新恨有

誰知舊事何堪省。夢遶陽臺寂寞回。半被殘香冷。酒邊詞作沾袖餘香冷。

阮郎歸

乙卯鄱陽道中作

江南江北雪漫漫。遙思易水寒。同雲深處是三關。斷腸山又山。天可老。海能翻。消除此恨難。頻聞遣使問平安。幾時鑿轡還。

滿庭芳

木犀詞、約去非、希箕、養真、同賦。

月窟蟠根。雲巖分種。絕知不是塵凡。琉璃翦葉。金粟綴花繁。黃菊周旋避舍。友蘭蕙、羞殺山礬。清香遠。秋風十里。鼻觀已先參。酒闌聽我語。平生半是。江北江南。經行處無窮。綠水青山。常被此花相惱。思共老。結屋中間。不因爾。薜林底事。遊戲到人寰。

西江月

游洞庭東西山。將有天台、雁宕之行。獲拜御書。薜林之賜。呈子發。元長、去非、翰林三學士。御

得意穿雲度水。及時斫玉分金。茲遊了卻未來心。怪我歸遲一任。居士何如學士。翰林休笑薜林。箇中真味少知音。不是清狂太甚。

更漏子

題趙伯山青白軒時
王豐父劉長因同賦

竹孤青。梅皚白。更著使君清絕。梅似竹。竹如君。須知德有鄰。月同
高。風同調。月底風前一笑。翻碎影。度微香。與人風味長。

浣溪沙

歲除集二老句。○酒邊
詞二老謂荆公、東坡。

爆竹聲中一歲除。東風送暖入屠蘇。瞳瞳曉色上林廬。
老去怕看新歷日。退歸擬學舊桃符。青春不染白髭鬚。

又

木岸花開。不數日謝去。每根不能
挽留。近得海上方。可作爐薰耐久。

醉裏驚從月窟來。睡餘如夢藥宮迴。碧雲時度小崔嵬。
憐我老。不論時節遣花開。從今休數返魂梅。疑是海仙

生查子

與客醉花下。落
藥忽墮酒盃中。

月姊倚秋風。香度青林杪。吹墮酒盃中。笑靨撩人小。
獨此情未了。醉裏又題詩。不覺花前老。薜蘿林萬事休。

謝無逸

案謝逸字無逸臨川人。有溪堂集十卷。溪堂詞一卷。

菩薩蠻

暄風遲日春光鬧。蒲桃水碧搖輕櫂。兩岸草煙低。青山啼子規。歸來愁未寢。黛淺眉痕沁。花影轉廊腰。紅添酒面潮。

南歌子

雨洗溪光淨。風吹柳帶斜。畫橋朱戶玉人家。簾外一眉新月浸梨花。金鴨香凝袖。銅花燭映紗。鳳盤宮錦小屏遮。夜靜寒生春筍理琵琶。

謁金門

簾外雨。洗盡楚鄉殘暑。白鷺影邊霞一縷。紺碧江天暮。沈水煙橫香霧。茗盃淺浮瓊乳。臥聽鷓鴣啼竹塢。竹風清院宇。

如夢令

花落鶯啼春暮。陌上綠楊飛絮。金鴨晚香寒。人在洞房深處。無語無語。葉上數聲疎雨。

又

門外桃花流水。日暖杜鵑聲碎。蕃馬小屏風。一枕華堂春睡。如醉如醉。正是困人天氣。

虞美人

碧梧翠竹交加影。角簾紗幮冷。疎雲淡月媚橫塘。一陣荷花風起入簾香。雁橫天末無消息。水閣吳山碧。刺桐花上蝶翩翩。惟有夜涼清夢到郎邊。

又

角聲吹散梅梢雪。疎影黃昏月。落英點點拂闌干。風送清香滿院作輕寒。花瓷羯鼓催行酒。紅袖摻纖手。曲聲未徹寶盃空。飲罷香薰

翠被錦屏中。

漁家傲

秋水無痕清見底。蓼花汀上西風起。一葉小舟煙霧裏。蘭檝熾。柳條帶雨穿雙鯉。自嘆直鉤無處使。笛聲吹散雲山翠。繪落霜刀紅縷細。新酒美。醉來獨枕蓑衣睡。

清平樂

曉風殘角。月裏梅花落。宿酒醒時滋味惡。翠被輕寒漠漠。夢回一點相思。遠山暗蹙眉愁。不覺肌膚瘦玉。但知帶減腰圍。

驀山溪

霜清木落。深院簾櫳靜。池面捲烟波。瑩寒冰。一奩明鏡。修雲拂檻。疎翠晚嬋娟。水雲收。山霧斂。野水一作江天迥。紅綃一作醉玉。酒面風前醒。簾幕護輕寒。錦屏空。燠爐燼冷。星橫參昴。梅徑月黃昏。清夢

覺淺眉顰。照溪堂詞改正窗外橫疎影。

玉樓春

弄晴數點梅。一作梨梢雨。門外畫橋寒食路。杜鵑飛破草閒煙。蛺蝶惹

殘花底露。臂鞦紅錦鳴腰鼓。寒雁影斜天上柱。案西溪詞云：東君

韶華都付與、妝成不管露桃嗔。舞罷從教風柳妬。二句不同。

武陵春

畫燭籠紗紅影亂。門外紫騮嘶。分破雲團月影虧。雪浪皺清漪。捧

椀纖纖春筍瘦。乳霧泛冰蕤。兩腋風輕拂袖飛。歸去酒醒時。

浪淘沙

料峭小桃風。凝澹春容。寶燈山列半天中。麗服靚裝攜手處。笑語匆

匆。酒滴小槽紅。一飲千鍾。金蓮擎燭絳紗籠。歸去笙歌喧院落。月

照簾櫳。

南鄉子

淺色染春衣。衣上雙雙小雁飛。袖捲藕絲寒玉瘦。彈碁。贏得花前酒一卮。冰雪染胭脂。絳蠟香濃落日西。唱徹陽關人欲去。依依。醉眼橫波翠黛低。

醉落魄

霜砧聲急。蕭蕭疎雨梧桐溼。無言獨倚闌干立。簾捲黃昏。一陣西風入。年時畫閣佳賓集。玉人檀板當筵執。銀瓶已斷絲繩汲。莫話前歡。忍對屏山泣。

鵲橋仙

蝶飛煙草。鶯啼雲樹。滿院垂楊口。溪堂詞作陰綠。輕風飄盡杏花紅。更吹皺。池面縠。溪堂詞作池波如縠珠簾日晚。銀屏人散。樓上醉橫雙。溪堂詞作霜竹。一春若道不相思。緣底事紅綃褪玉。

踏莎行

柳絮風輕。梨花雨細。春陰院落簾垂地。碧溪影裏小橋橫。青帘布上
孤煙起。鏡約關情。琴心破睡。輕寒漠漠侵鴛被。酒醒口溪堂詞作霞散
臉邊紅。夢回山蹙眉閒翠。

採桑子

楚山削玉雲中碧。影落沙汀。秋水澄凝。一抹江天雁字橫。金錢滿
地西風急。紅蓼烟輕。簾外砧聲。驚起青樓夢不成。

江城子

一江秋水碧灣灣。繞青山。玉連環。簾幕低垂。人在畫屏閒。閒抱琵琶
尋舊曲。彈未了。意瀟珊。飛鴉數點拂雲端。倚欄看。楚天寒。擬倩西
風。吹夢到長安。恰似梨花春帶雨。愁滿眼。淚闌干。

鷓鴣天

桐葉成陰拂畫簷。清風涼處捲疎簾。紅綃舞袖縈腰柳。綠玉眉心媚
臉蓮。愁滿眼。水連天。香牋小字倩誰傳。梅黃楚岸垂垂雨。草碧吳
江淡淡煙。

浣溪沙

樓閣簾垂乳燕飛。圓荷細細點清漪。溪堂詞作溪薰風破夢晚涼時。玉
軫琴邊蘭思遠。霜紈扇裏翠眉低。揉藍衫子鬧蜂兒。

菩薩蠻

縠紋波面浮鷓鴣。蒲芽聳出參差碧。滿院落梅香。柳梢初弄黃。衣
輕紅袖皺。香溪堂詞作春困花枝瘦。睡起玉釵橫。隔簾聞曉鶯。

